





**হেলাল হাফিজ** (জন্ম: ৭ অক্টোবর, ১৯৪৮) বাংলাদেশের একজন আধুনিক কবি যিনি স্বল্পপ্রজ হলেও বিংশ শতাব্দীর শেষাংশে বিশেষ জনপ্রিয়তা অর্জন করেন। তাঁর কবিতা সংকলন **যে জলে আগুন জ্বলে** ১৯৮৬ সালে প্রকাশের পর খ্যাতিমান এই কবি হঠাৎ নিখোঁজ হয়ে গেলেন। 'নিখোঁজ' শব্দটি বোধ করি আপত্তিকর কিংবা এর অর্থ স্পষ্ট করে দেয়ার দাবি রাখে। মূলত তিনি নিখোঁজ ছিলেন না। কবি তো বেঁচে থাকেন কবিতার মধ্য দিয়েই। তবে নিজেকে তিনি গুটিয়ে নিয়েছিলেন। নিজেকে আড়ালে রাখার এই প্রক্রিয়া যত না অবচেতনে-সম্ভবত তার চেয়ে বেশি ঘটে চলেছিল সচেতনভাবে। হেলাল হাফিজ জনপ্রিয় কারণ তিনি মানুষের সেন্টিমেন্টকে উসকে দিতে পেরেছেন। ২৬ বছর পর ২০১২ সালে আসে তার দ্বিতীয় কাব্যগ্রন্থ 'কবিতা একাত্তর'। তাঁর অন্যতম জনপ্রিয় কবিতা 'নিষিদ্ধ সম্পাদকীয়';- এ কবিতার দুটি পংক্তি "এখন যৌবন যার মিছিলে যাবার তার শ্রেষ্ঠ সময়, এখন যৌবন যার যুদ্ধে যাবার তার শ্রেষ্ঠ সময়" বাংলাদেশের কবিতামোদী ও সাধারণ পাঠকের মুখে উদ্ভারিত হয়ে থাকে। তিনি সাংবাদিক ও সাহিত্য সম্পাদক হিসাবে বিভিন্ন পত্র-পত্রিকায় কাজ করেছেন। দেহাতে হলেও ২০১৪ খ্রিস্টাব্দে তিনি বাংলা একাডেমি পুরস্কারে ভূষিত হন।

## আমার কিছু কথা

বই এমন একটি জিনিস যার সাথে রাগ করা চলে না। বই অবসরের বন্ধু, বই হাসায় আবার কখনো বা কাঁদায়, বই অবাক করে, বই নতুন কিছু জানায়-শেখায়, বই কল্পনার রাজ্য তৈরি করে। ধ্বংস ও ধসের সামনে বই সবচেয়ে বড় প্রতিরোধ। বই আমাদের মৌলিক চিন্তাভাবনার শানিত অস্ত্র। বইয়ের অস্তিত্ব নিয়ে চারিদিকে আশংকা, নতুন প্রজন্ম চক্ৰমকের আকর্ষণে বইয়ের দিক থেকে ঘুরিয়ে নিচ্ছে মুখ। এখন নতুন নতুন প্রযুক্তির মাধ্যমে খুব সহজে বই পড়া যাচ্ছে। আমি চাই আমাদের নতুন প্রজন্ম বইয়ের দিকে ধাবিত হোক, জ্ঞান অর্জন করুক, জ্ঞান বিতরণ করুক সবার মাঝে। আশা করি আপনাদের সহযোগীতায় আমার এই ইচ্ছা আরোও দৃঢ় হবে।

- অপ্রকাশিত ভাইরাস

<https://www.facebook.com/next.virus>

বইয়ের কভার পেজটি তৈরি করেছেন: কুফা সামছু (Kufa Samsu)

## সূচিপত্র

কবিতার নাম	পৃষ্ঠা	কবিতার নাম	পৃষ্ঠা	কবিতার নাম	পৃষ্ঠা
অগ্ন্যুৎসব	০৫	ক্যাকটাস	২৪	প্রস্থান	৪২
অনির্গীত নারী	০৬	রাজনীতি ঘরোয়া	২৫	ফেরীওয়ালা	৪৩
অন্যরকম সংসার	০৭	ডাকাত	২৬	বাম হাত	৪৪
অমীমাংসিত সন্ধি	০৮	তীর্থ	২৭	বেদনা বোনের মত	৪৫
অশ্লীল সভ্যতা	০৯	তুমি ডাক দিলে	২৮	ভূমিহীন কৃষকের গান	৪৬
অস্ত্র সমর্পণ	১০	তৃষ্ণা	২৯	মানবানল	৪৭
অহংকার	১১	তোমাকেই চাই	৩০	যাতায়াত	৪৮
আমার কি এসে যাবে	১২	দুঃখের আরেক নাম	৩১	যার যেখানে জায়গা	৪৯
সকল আয়োজন আমার	১৩	দুঃসময়ে আমার যৌবন	৩২	যুগল জীবনী	৫০
ইচ্ছে ছিলো	১৪	নাম ভূমিকায়	৩৩	যেভাবে সে এলো	৫১
ইদানিং জীবন যাপন	১৫	নিখুঁত স্ট্র্যাটেজী	৩৪	খাল	৫২
উপসংহার	১৬	নিরাশ্রয় পাঁচটি আগুন	৩৫	রাডার	৫৩
উৎসর্গ	১৭	নিষিদ্ধ সম্পাদকীয়	৩৬	লাবণ্যের লতা	৫৪
একটি পতাকা পেলে	১৮	নেত্রকোনা	৩৭	শামুক	৫৫
কবি ও কবিতা	১৯	পরানের পাখি	৩৮	সম্প্রদান	৫৬
কবিতার কসম খেলাম	২০	পৃথক পাহাড়	৩৯	হিজলতলীর সুখ	৫৭
কবুতর	২১	প্রতিমা	৪০	হিরণবালা	৫৮
কে	২২	প্রত্যাবর্তন	৪১	হৃদয়ের ঋণ	৫৯
কোমল কংক্রিট	২৩			ব্যবধান	৬০



## ১ অগ্ন্যুৎসব .

ছিল তা এক অগ্ন্যুৎসব, সেদিন আমি  
সবটুকু বুক রেখেছিলাম স্বয়ংক্রিয় আগ্নেয়াস্ত্রে  
জীবন বাজি ধরেছিলাম প্রেমের নামে  
রক্ত ঋণে স্বদেশ হলো,  
তোমার দিকে চোখ ছিলো না  
জন্মভূমি সেদিন তোমার সতীন ছিলো।

আজকে আবার জীবন আমার ভিন্ন স্বপ্নে অংকুরিত অগ্ন্যুৎসবে  
তোমাকে চায় শুধুই তোমায়।

রঙিন শাড়ির হলুদ পাড়ে ঋতুর প্লাবন নষ্ট করে  
ভর দুপুরে শুধুই কেন হাত বেঁধেছো বুক ঢেকেছো  
যুঁই চামেলী বেলীর মালায়,  
আমার বুক সেদিন যেমন আগুন ছিলো  
ভিন্নভাবে জ্বলছে আজও,  
তবু সবই ব্যর্থ হবে  
তুমি কেবল যুঁই চামেলী বেলী ফুলেই মগ্ন হলে।

তার চেয়ে আজ এসো দু'জন জাহিদুরের গানের মতন  
হৃদয় দিয়ে বোশেখ ডাকি, দু'জীবনেই বোশেখ আনি।  
জানো হেলেন, আগুন দিয়ে হোলি খেলায় দারুন আরাম  
খেলবো দু'জন এই শপথে  
এসো স্বকাল শুদ্ধ করি দুর্বিনীত যৌবনে। -

## ২ অনির্গত নারী .

নারী কি নদীর মতো  
নারী কি পুতুল,  
নারী কি নীড়ের নাম  
টবে ভুল ফুল।

নারী কি বৃক্ষ কোনো  
না কোমল শিলা,  
নারী কি চৈত্রের চিতা  
নির্মীলিত নীলা।

### ৩ অন্যরকম সংসার .

এই তো আবার যুদ্ধে যাবার সময় এলো  
আবার আমার যুদ্ধে খেলার সময় হলো  
এবার রানা তোমায় নিয়ে আবার আমি যুদ্ধে যাবো  
এবার যুদ্ধে জয়ী হলে গোলাপ বাগান তৈরী হবে।

হয় তো দু'জন হারিয়ে যাবো ফুরিয়ে যাবো  
তবুও আমি যুদ্ধে যাবো তবু তোমায় যুদ্ধে নেবো  
অন্যরকম সংসারেতে গোলাপ বাগান তৈরী করে  
হারিয়ে যাবো আমরা দু'জন ফুরিয়ে যাবো।

স্বদেশ জুড়ে গোলাপ বাগান তৈরী করে  
লাল গোলাপে রক্ত রেখে গোলাপ কাঁটায় আগুন রেখে  
আমরা দু'জন হয় তো রানা মিশেই যাবো মাটির সাথে।

মাটির সাথে মিশে গিয়ে জৈবসারে গাছ বাড়াবো  
ফুল ফোটাবো, গোলাপ গোলাপ স্বদেশ হবে  
তোমার আমার জৈবসারে। তুমি আমি থাকবো তখন  
অনেক দূরে অন্ধকারে, অন্যরকম সংসারেতে।

## ৪ অমিমাংসিত সন্ধি .

তোমাকে শুধু তোমাকে চাই, পারো?  
পাই বা না পাই এক জীবনে তোমার কাছেই যাবো।

ইচ্ছে হলে দেখতে দিও, দেখো  
হাত বাড়িয়ে হাত চেয়েছি রাখতে দিও, রেখো

অপূণতায় নষ্টেকষ্টে গেলো-  
এতোটা কাল, আজকে যদি মাতাল জোয়ার এলো  
এসো দু'জন প্লাবিত হই প্রেমে  
নিরাভরণ সখ্য হবে যুগলস্নানে নেমে। -

থাকবো ব্যাকুল শর্তবিহীন নত  
পরস্পরের বুকের কাছে মুগ্ধ অভিভূত।



## ৫ অশ্লীল সভ্যতা .

নিউট্রন বোমা বোঝ  
মানুষ বোঝ না !

## ৬ অস্ত্র সমর্পণ .

মারণাস্ত্র মনে রেখো ভালোবাসা তোমার আমার।  
 নয় মাস বন্ধু বলে জেনেছি তোমাকে, কেবল তোমাকে।  
 বিরোধী নিধন শেষে কতোদিন অকারণে  
 তাঁবুর ভেতরে ঢুকে দেখেছি তোমাকে বারবার কতোবার।

মনে আছে, আমার জ্বালার বুক  
 তোমার কঠিন বুকে লাগাতেই গর্জে উঠে তুমি  
 বিস্ফোরণে প্রকম্পিত করতে আকাশ, আমাদের ভালবাসা  
 মুহূর্তেই লুফে নিত অত্যাচারী শত্রুর নিশ্বাস।:

মনে পড়ে তোমার কঠিন নলে তন্দ্রাতুর কপালের  
 মধ্যভাগ রেখে, বুকে রেখে হাত  
 কেটে গেছে আমাদের জঙ্গলের কতো কালো রাত!  
 মনে আছে, মনে রেখো  
 আমাদের সেই সব প্রেমইতিহাস। -

অথচ তোমাকে আজ সেই আমি কারাগারে  
 সমর্পণ করে, ফিরে যাচ্ছি ঘরে  
 মানুষকে ভালোবাসা ভালোবাসি বলে।

যদি কোনোদিন আসে আবার দুর্দিন,  
 যেদিন ফুরাবে প্রেম অথবা হবে না প্রেম মানুষে মানুষে  
 ভেঙে সেই কালো কারাগার  
 আবার প্রণয় হবে মারণাস্ত্র তোমার আমার।

## ৭ অহংকার .

বুকের সীমান্ত বন্ধ তুমিই করেছো  
থুলে রেখেছিলাম অর্গল,  
আমার যুগল চোখে ছিলো মানবিক খেলা  
তুমি শুধু দেখেছো অনল।

তুমি এসেছিলে কাছে, দূরেও গিয়েছো যেচে  
ফ্রিজ শটে স্থির হয়ে আছি,  
তুমি দিয়েছিলে কথা, অপারগতার ব্যথা  
সব কিছু বুকে নিয়ে বাঁচি।

উথাল পাথাল করে সব কিছু ছুঁয়ে যাই  
কোনো কিছু ছোঁয় না আমাকে,  
তোলপাড় নিজে তুলে নিদারুণ খেলাচ্ছলে  
দিয়ে যাই বিজয় তোমাকে।

## ৮ আমার কী এসে যাবে .

আমি কি নিজেই কোন দূর দ্বীপবাসী এক আলাদা মানুষ?  
নাকি বাধ্যতামূলক আজ আমার প্রশ্ন,  
তবে কি বিজয়ী হবে সভ্যতার অশ্লীল শ্লোগান?

আমি তো গিয়েছি জেনে প্রণয়ের দারুণ আকালে  
নীল নীল বনভূমি ভেতরে জন্মালে  
কেউ কেউ চলে যায়, চলে যেতে হয়  
অবলীলাক্রমে কেউ বেছে নেয় পৃথক প্লাবন,  
কেউ কেউ এইভাবে চলে যায় বৃকে নিয়ে ব্যাকুল আগুন।

আমার কী এসে যাবে, কিছু মৌল ব্যবধান ভালোবেসে  
জীবন উড়ালে একা প্রিয়তম দ্বীপের উদ্দেশ্যে।

নষ্ট লগ্ন গেলে তুমিই তো দীর্ঘশ্বাস ছেড়ে  
সুকঠিন কংক্রিটে জীবনের বাকি পথ হেঁটে যেতে যেতে  
বারবার থেমে যাবে জানি  
'আমি' ভেবে একেতাকে দেখে। -  
তুমিই তো অসময়ে অন্ধকারে  
অন্তরের আরতির ঘূতের আগুনে পুড়ে নির্জনে।

আমাকে পাবে না খুঁজে, কেঁদেকেটে-, মামুলী ফাল্গুনে।

## ৯ সকল আয়োজন আমার

আমাকে দুঃখের শ্লোক কে শোনাবে?  
কে দেখাবে আমাকে দুঃখের চিহ্ন কী এমন,  
দুঃখ তো আমার সেই জন্ম থেকে জীবনের  
একমাত্র মৌলিক কাহিনী।

আমার শৈশব বলে কিছু নেই  
আমার কৈশোর বলে কিছু নেই,  
আছে শুধু বিষাদের গহীন বিস্তার।  
দুঃখ তো আমার হাত-হাতের আঙুন-আঙুলের নখ  
দুঃখের নিখুঁত চিত্র এ কবির আপাদমস্তক।

আমার দুঃখ আছে কিন্তু আমি দুখী নই,  
দুঃখ তো সুখের মতো নীচ নয়, যে আমাকে দুঃখ দেবে।  
আমার একেকটি দুঃখ একেকটি দেশলাই কাঠির মতন,  
অবয়ব সাজিয়েছে ভয়ঙ্কর সুন্দরের কালো কালো অগ্নিতিলকে,  
পাঁজরের নাম করে ওসব সংগোপনে  
সাজিয়ে রেখেছি আমি সেফটিম্যাচের মতো বুকে।-

## ১০ ইচ্ছে ছিলো .

ইচ্ছে ছিলো তোমাকে সম্রাজ্ঞী করে সাম্রাজ্য বাড়াবো  
ইচ্ছে ছিলো তোমাকেই সুখের পতাকা করে  
শান্তির কপোত করে হৃদয়ে উড়াবো।

ইচ্ছে ছিলো সুনিপুণ মেকআপম্যানের মতো-  
সূর্যালোকে কেবল সাজাবো তিমিরের সারাবেলা  
পৌরুষের প্রেম দিয়ে তোমাকে বাজাবো, আহা তুমুল বাজাবো।

ইচ্ছে ছিলো নদীর বক্ষ থেকে জলে জলে শব্দ তুলে  
রাখবো তোমার লাজুক চঞ্চুতে,  
জন্মাবধি আমার শীতল চোখ  
তাপ নেবে তোমার দু'চোখে।

ইচ্ছে ছিল রাজা হবো  
তোমাকে সম্রাজ্ঞী করে সাম্রাজ্য বাড়াবো,  
আজ দেখি রাজ্য আছে  
রাজা আছে  
ইচ্ছে আছে,  
শুধু তুমি অন্য ঘরে।

## ১১ ইদানিং জীবন যাপন .

আমার কষ্টেরা বেশ ভালোই আছেন,  
প্রাত্যহিক সব কাজ ঠিকঠাক করে চলেছেন-  
থাচ্ছেনদাচ্ছেন-, অফিসে যাচ্ছেন,  
প্রেসক্লাবে আড্ডাও দিচ্ছেন।

মাঝে মাঝে কষ্টেরা আমার  
সারাটা বিকেল বসে দেখেন মৌসুমী খেলা,  
গোল স্টেডিয়াম যেন হয়ে যায় নিজেই কবিতা।

আজকাল আমার কষ্টেরা বেশ ভালোই থাকেন,  
অক্সুরোদগম প্রিয় এলোমেলো যুবকের  
অতৃপ্ত মানুষের শুশ্রূষা করেন। বিরোধী দলের ভুল  
মিছিলের শোভা দেখে হাসেন তুমুল,  
ক্লান্তিতে গভীর রাতে ঘরহীন ঘরেও ফেরেন,  
নির্জন নগরে তারা কতিপয় নাগরিক যেন  
কতো কথোপকথনে কাটান বাকিটা রাত,  
অবশেষে কিশোরীর বুকের মতন সাদা ভোরবেলা  
অধিক ক্লান্তিতে সব ঘুমিয়ে পড়েন।

আমার কষ্টেরা বেশ ভালোই আছেন, মোটামুটি সুখেই আছেন।  
প্রিয় দেশবাসী;  
আপনারা কেমন আছেন?



## ১২ উপসংহার .

আমার যত শুভ্রতা সব দেবো,  
আমি নিপুণ ল্লটিং পেপার  
সব কালিমা, সকল ব্যথা ক্ষত শুষেই নেবো।

## ১৩ উৎসর্গ .

আমার কবিতা আমি দিয়ে যাবো  
আপনাকে, তোমাকে ও তোকে।

কবিতা কি কেবল শব্দের মেলা, সংগীতের লীলা?  
কবিতা কি ছেলেখেলা, অবহেলা রঙিন বেলুন?  
কবিতা কি নোটবই, টুওয়ান-ইন-, অভিজাত মহিলা সেলুন-?

কবিতা তো অবিকল মানুষের মতো  
চোখমন আছে-মুখ-, সেও বিবেক শাসিত,  
তারও আছে বিরহে পুষ্পিত কিছু লাল নীল ক্ষত।

কবিতা তো রূপান্তরিত শিলা, গবেষণাগারে নিয়ে  
থুলে দেখো তার সব অণুপরমাণু জুড়ে-  
কেবলি জড়িয়ে আছে মানুষের মৌলিক কাহিনী।  
মানুষের মতো সেও সভ্যতার চাষাবাদ করে,  
সেও চায় শিল্প আর স্নোগানের শৈল্পিক মিলন,  
তার তা ভূমিকা চায় যতোটুকু যার উৎপাদন।

কবিতা তো কেঁদে ওঠে মানুষের যে কোনো অসুখে-,  
নষ্ট সময় এলে উঠানে দাঁড়িয়ে বলে,-  
পথিক এ পথে নয়  
'ভালোবাসা এই পথে গেছে'।

আমার কবিতা আমি দিয়ে যাবো  
আপনাকে, তোমাকে ও তোকে।

## ১৪ একটি পতাকা পেলে .

কথা ছিলো একটি পতাকা পেলে  
আমি আর লিখবো না বেদনার অঙ্কুরিত কষ্টের কবিতা

কথা ছিলো একটি পতাকা পেলে  
ভজন গায়িকা সেই সন্ন্যাসিনী সবিতা মিস্ট্রেস  
ব্যর্থ চল্লিশে বসে বলবেন,-‘পেয়েছি, পেয়েছি’।

কথা ছিলো একটি পতাকা পেলে  
পাতা কুড়োনির মেয়ে শীতের সকালে  
ওম নেবে জাতীয় সংগীত শুনে পাতার মর্মরে।

কথা ছিলো একটি পতাকা পেলে  
ভূমিহীন মনুমিয়া গাইবে তুষ্টির গান জ্যেষ্ঠেবোশেথে-,  
বাঁচবে যুদ্ধের শিশু সসন্মানে সাদা দুতেভাতে। -

কথা ছিলো একটি পতাকা পেলে  
আমাদের সব দুঃখ জমা দেবো যৌথখামারে-,  
সম্মিলিত বৈজ্ঞানিক চাষাবাদে সমান সুখের ভাগ  
সকলেই নিয়ে যাবো নিজের সংসারে।

## ১৫ কবি ও কবিতা .

কবির জীবন খেয়ে জীবন ধারণ করে  
কবিতা এমন এক পিতৃঘাতী শব্দের শরীর,  
কবি তবু সম্বলে কবিতাকে লালন করেন,  
যেমন যত্নে রাখে তীর  
জেনেশুনে সব জল ভয়াল নদীর। -

সর্বভুক এ কবিতা কবির প্রভাত খায়  
দুপুর সন্ধ্যা খায়, অবশেষে  
নিশীথে তাকায় যেন বয়ঃসন্ধিকালের কিশোরী,  
কবিকে মাতাল করে  
শুরু হয় চারু তোলপাড়,  
যেন এক নির্জন বনের কোনো হরিণের লন্ডলন্ড খেলা  
নিজেরই ভিতরে নিয়ে সুবাসের শুদ্ধ কস্তুরী।

কবির কষ্ট দিয়ে কবিতা পুষ্ট হয়  
উজ্জ্বলতা বাড়ায় বিবেক,  
মানুষের নামে বাড়ে কবিতার পরমায়ু  
অমরতা উভয়ের অনুগত হয়।

## ১৬ কবিতার কসম খেলাম .

আমি আর আহত হবো না,  
কোনো কিছুতেই আমি শুধু আর আহত হবো না।

যে নদী জলের ভারে হারাতো প্লাবনে  
এখন শ্রাবণে সেই জলের নদীর বুকে  
জলাভাবে হাহাকার দেখে আমি আহত হবো না।

সবুজ সবুজ মাঠ চিরে চিরে  
কৃষকের রাখালের পায়ে গড়া দু'পায়া পথের বুকে  
আজ সেই সরল সুন্দর সব মানুষের চিতা দেখে  
আহত হবো না, আর শুধু আহত হবো না।

বৃষ্ণ হারালে তার সবুজ পিরান, মৃত্তিকার ফুরালে সুঘ্রাণ,  
কষ্টের ইস্কুল হলে পুষ্পিত বাগান, আমি আহত হবো না।

পাখি যদি না দেয় উড়াল, না পোড়ে আগুন,  
অদ্ভুত বন্ধ্যা হলে উর্বরা ফাগুন, আমি আহত হবো না।

মানুষ না বোঝে যদি আরেক মানুষ  
আমি আহত হবো না, আহত হবো না।  
কবিতার কসম খেলাম আমি শোধ নেবো সুদে ও আসলে,  
এবার নিহত হবো  
ওসবের কোনো কিছুতেই তবু শুধু আর আহত হবো না।

## ১৭ কবুতর .

প্রতীক্ষায় থেকো না আমার  
 আমি আসবো না, থাকলো কথার কবুতর  
 কখনো বাইষ্যা মাসে পেয়ে অবসর  
 নিতান্তই জানতে ইচ্ছে হলে আমার খবর  
 পাখিকে জিজ্ঞেস করো নিরিবিলি,  
 পক্ষপাতহীন পাখি বিস্তারিত সংবাদ জানাবে  
 কী কী ব্যথা এবং আর্দ্রতা  
 রেখেছে দখল করে আশৈশব আমার একালা,  
 আমি কতো একা,  
 কতোখানি ক্ষত আর ক্ষতি নিয়ে  
 বেদনার অনুকূলে প্রবাহিত আমার জীবন।

নিপুণ সন্ধান করো  
 পাখির চঞ্চুতেকোমল পালকে-চোখে-  
 আমার বিস্তার আর বিন্যাসের কারুকাজ পাবে,  
 কী আমার আকাঙ্ক্ষিত গঠন প্রণালী আর  
 আমার কী রাজনীতি কবুতর জানে।

জীবন যাপনে কতো মানবিক,  
 কবিতায় কতোটা মানুষ,  
 পরিপাটি নির্দোষ সন্ধান নিয়ে  
 আমি কতো বিনীত বিদ্রোহী,  
 পাখিকে জিজ্ঞেস করো সব জেনে যাবে  
 অবিকল আমার মতন করে কবুতর নির্ভুল জানাবে।

## ১৮ কে .

বেরিয়ে যে আসে সে তো এভাবেই আসে,  
 দুর্বিনীত ধ্রুপদী টংকার তুলে  
 লন্ডভন্ড করে চলে আসে মৌলিক ভ্রমণে, পথে  
 প্রচলিত রীতিনীতি কিঞ্চু মানে না। -

আমি এক সেরকম উত্থানের অনুপম কাহিনী শুনেছি।

এমন অনমনীয় পৃথক ভ্রমণে সেই পরিব্রাজকের  
 অনেক অবর্ণনীয় অভিমান থাকে,  
 টসটসে রসাল ফলের মতো ক্ষত আর  
 ব্যক্তিগত ক্ষয়ক্ষতি থাকে। তাকে তুমুল শাসায়-  
 মূলচ্যুত মানুষের ভুল ভালোবাসা, রাজনীতি,  
 পক্ষপাতদুষ্ট এক স্টাফ রিপোর্টার। আর তার সহগামী  
 সব পাখিদের ঈর্ষার আকাশে ভাসে ব্যর্থতার কিচিরমিচির। -

এতো প্রতিকূলতায় গতি পায় নিষ্ঠাবান প্রেমিক শ্রমিক,  
 আমি এক সে রকম পথিকের প্রতিকৃতি নির্ভুল দেখেছি।

ইদানিং চারদিকে সমস্বরে এক প্রশ্ন,-কে? কে? কে?  
 বেরিয়ে যে আসে সে তো এই পথে এইভাবে আসে, নিপুণ ভঙ্গিতে।



## ১৯ কোমল কংক্রিট .

জলের আগুনে পুড়ে হয়েছি কমল,  
কী দিয়ে মুছবে বলো আগুনের জল।

## ২০ ক্যাকটাস .

দারুন আলাদা একা অভিমानी এই ক্যাকটাস।  
যেন কোন বোবা রমণীর সখী ছিলো দীর্ঘকাল  
কিংবা আজন্ম শুধু দেখেছে আকাল  
এরকম ভাবভঙ্গি তার। -  
ধূপদী আঙিনা ব্যাপী  
কন্টকিত হাহাকার আর অবহেলা,  
যেন সে উদ্ভিদ নয়  
তাকালেই মনে হয় বিরান কারবালা।

হয় তো কেটেছে তার মায়া ও মমতাহীন সজল শৈশব  
অথবা গিয়েছে দিন  
এলোমেলো পরিচর্যাহীন এক রঙিন কৈশোর,  
নাকি সে আমার মত খুব ভালোবেসে  
পুড়েছে কপাল তার আকালের এই বাংলাদেশে।

বোকা উদ্ভিদ তবে কি  
মানুষের কাছে প্রেম চেয়েছিলো?  
চেয়েছিলো আরো কিছু বেশি।

## ২১ ঘরোয়া রাজনীতি .

ব্যর্থ হয়ে থাকে যদি প্রণয়ের এতো আয়োজন,  
আগামী মিছিলে এসো  
স্লোগানে স্লোগানে হবে কথোপকথন।

আকালের এই কালে সাধ হলে পথে ভালোবেসো,  
ধূপদী পিপাসা নিয়ে আসো যদি  
লাল শাড়িটা তোমার পড়ে এসো।

## ২২ ডাকাত .

তুমি কে হ?  
 সোনালী ছনের বাড়ি তছনছ করে রাতে  
 নির্বিচারে ঢুকে গেলে অন্দরমহলে-  
 বেগানা পুরুষ, লাজশরমের মাথা খেয়ে-  
 তুমি কে হে?

তোমাকে তো কখনো দেখিনি আগে এ তল্লাটে  
 মারী ও মড়কে, ঝড়ে, কাঙ্ক্ষিত বিদ্রোহে।  
 আমাদের যুদ্ধের বছরে  
 ভিন্ গেরামের কতো মানুষের পদচারণায়  
 এ বাড়ি মুখর ছিলো, তোমাকে দেখিনি ত্রিসীমায়। -

চতুর বণিক তুমি আঁধারে নেমেছো এই বানিজ্য ভ্রমণে,  
 কে জানে কী আছে পাড়া! পড়শীর মনে-  
 লোভে আর লালসায় অবশেষে আগন্তুক সর্বস্ব হারাবে,  
 কেন না প্রভাত হলে চারদিকে মানুষের ঢল নেমে যাবে।

## ২৩ তীর্থ .

কেন নাড়া দিলে?  
নাড়ালেই নড়ে না অনেক কিছু  
তবু কেন এমন নাড়ালে?  
পৃথিবীর তিন ভাগ সমান দু'চোখ যার  
তাকে কেন একমাস শ্রাবণ দেখালে!

এক ওভাবে নাড়ালে?  
যেটুকু নড়ে না তুমুলভাবে ভেতরে বাহিরে  
কেন তাকে সেটুকু নাড়ালে?

ভয় দেখালেই ভয় পায় না অনেকে,  
তবু তাকে সে ভয় দেখালে?  
যে মানুষ জীবনের সব ক'টি শোকদ্বীপে গেছে-,  
সব কিছু হারিয়েই সে মানুষ  
হারাবার ভয় হারিয়েছে,  
তার পর তীর্থ হয়েছে।

## ২৪ তুমি ডাক দিলে .

একবার ডাক দিয়ে দেখো আমি কতোটা কাঙাল,  
কতো হলুস্কুল অনটন আজন্ম ভেতরে আমার।

তুমি ডাক দিলে  
নষ্ঠ কষ্ঠ সব নিমিষেই ঝেড়ে মুছে  
শব্দের অধিক দ্রুত গতিতে পৌছুবো  
পরিণত প্রণয়ের উৎসমূল ছোঁব  
পথে এতোটুকু দেরিও করবো না।  
তুমি ডাক দিলে  
সীমাহীন খাঁ খাঁ নিয়ে মরোদ্যান হবো,  
তুমি রাজি হলে  
যুগল আহলাদে এক মনোরম আশ্রম বানাবো।

একবার আমন্ত্রণ পেলে  
সব কিছু ফেলে  
তোমার উদ্দেশে দেবো উজাড় উড়াল,  
অভয়ারণ্য হবে কথা দিলে  
লোকালয়ে থাকবো না আর  
আমরণ পাখি হয়ে যাবো, -খাবো মৌনতা তোমার

## ২৫ তৃষ্ণা .

কোনো প্রাপ্তিই পূর্ণ প্রাপ্তি নয়  
কোনো প্রাপ্তির দেয় না পূর্ণ তৃষ্ণি  
সব প্রাপ্তি ও তৃষ্ণি লালন করে  
গোপনে গহীনে তৃষ্ণা তৃষ্ণা তৃষ্ণা।

আমার তো ছিলো কিছু না কিছু যে প্রাপ্য  
আমার তো ছিলো কাম্য স্বপ্ন তৃষ্ণি  
অথচ এ পোড়া কপালের ক্যানভাসে  
আজন্ম শুধু শূন্য শূন্য শূন্য।

তবে বেঁচে আছি একা নিদারুণ সুখে  
অনাবিষ্কৃত আকাঙ্ক্ষা নিয়ে বুক  
অবর্ণনীয় শুশ্রূষাহীন কষ্টে  
যায় যায় দিন ক্লান্ত ক্লান্ত ক্লান্ত।



## ২৬ তোমাকেই চাই .

আমি এখন অন্য মানুষ ভিন্ন ভাবে কথা বলি  
কথার ভেতর অকথিত অনেক কথা জড়িয়ে ফেলি  
এবং চলি পথ বেপথে যখন তখন।

আমি এখন ভিন্ন মানুষ অন্যভাবে কথা বলি  
কথার ভেতর অনেক কথা লুকিয়ে ফেলি,  
কথার সাথে আমার এখন তুমুল খেলা  
উপযুক্ত সংযোজনে জীর্ণশীর্ণ শব্দমালা-  
ব্যঞ্জনা পায় আমার হাতে অবলীলায়,  
ঠিক জানি না পারস্পরিক খেলাধূলায়  
কখন কে যে কাকে খেলায়।

অপুষ্টিতে নষ্ট প্রাচীন প্রেমের কথা যত্রতত্র কীর্তন আমার  
মাঝে মাঝে প্রণয় বিহীন সভ্যতাকে কচি প্রেমের পত্র লিখি  
যেমন লেখে বয়ঃসন্ধিকালের মা-নুষ নিশীথ জেগে।

আমি এখন অন্য মানুষ ভিন্নভাবে চোখ তুলে চাই  
খুব আলাদা ভাবে তাকাই  
জন্মাবধি জলের যুগল কলস দেখাই,  
ভেতরে এক তৃতীয় চোখ রঞ্জনালায় কর্মরত  
সব কিছু সে সঠিকভাবে সবটা দেখে এবং দারুণ প্রণয় কাতর।

আমি এখন আমার ভেতর অন্য মানুষ গঠন করে সংগঠিত,  
বীর্যবান এক ভিন্ন গোলাপ এখন কসম খুব প্রয়োজন।

## ২৭ দুঃখের আরেক নাম .

আমাকে স্পর্শ করো, নিবিড় স্পর্শ করো নারী।  
 অলৌকিক কিছু নয়,  
 নিতান্তই মানবিক যাদুর মালিক তুমি  
 তোমার স্পর্শেই শুধু আমার উদ্ধার।

আমাকে উদ্ধার করো পাপ থেকে,  
 পঙ্কিলতা থেকে, নিশ্চিত পতন থেকে।  
 নারী তুমি আমার ভিতরে হও প্রবাহিত দুর্বিনীত নদীর মতন,  
 মিলেমিশে একাকার হয়ে এসো বাঁচি  
 নিদারুণ দুঃসময়ে বড়ো বেশি অসহায় একা পড়ে আছি।  
 তুমুল ফাল্গুন যায়, ডাকে না কোকিল কোনো ডালে,  
 আকস্মিক দু'একটা কুহ কুহ আর্তনাদ  
 পৃথিবীকে উপহাস করে।  
 একদিন কোকিলেরো সুসময় ছিলো, আজ তারা  
 আমার মতোই বেশ দুঃসময়ে আছে  
 পাখিদের নীলাকাশ বিষাক্ত হয়ে গেছে সভ্যতার অশ্লীল বাতাসে।

এখন তুমিই বলো নারী  
 তোমার উদ্যান ছাড়া আমি আর কোথায় দাঁড়াবো।  
 আমাকে দাঁড়াতে দাও বিশুদ্ধ পরিপূর্ণতায়,  
 ব্যাকুল শুশ্রূষা দিয়ে আমাকে উদ্ধার করো  
 নারী তুমি শৈল্পিক তাবিজ,  
 এতোদিন নারী ও রমনীহীন ছিলাম বলেই ছিলো  
 দুঃখের আরেক নাম হেলাল হাফিজ।

## ২৮ দুঃসময়ে আমার যৌবন .

মানব জন্মের নামে হবে কলঙ্ক হবে  
এরকম দুঃসময়ে আমি যদি মিছিলে না যাই,  
উত্তর পুরুষে ভীরা কাপুরুষের উপমা হবো  
আমার যৌবন দিয়ে এমন দুর্দিনে আজ  
শুধু যদি নারীকে সাজাই।

## ২৯ নাম ভূমিকায়

তাকানোর মতো করে তাকালেই চিনবে আমাকে।

আমি মানুষের ব্যকরণ  
জীবনের পুষ্পিত বিজ্ঞান  
আমি সভ্যতার শুভ্রতার মৌল উপাদান,  
আমাকে চিনতেই হবে  
তাকালেই চিনবে আমাকে।

আমাকে না চেনা মানে  
মাটি আর মানুষের প্রেমের উপমা সেই  
অনুপম যুদ্ধকে না চেনা।

আমাকে না চেনা মানে  
সকালের শিশির না চেনা,  
ঘাসফুল, রাজহাঁস, উদ্ভিত না চেনা।

গাভিন ফেতের ঘ্রাণ, জলের কসম, কাক  
পলিমাটি চেনা মানে আমাকেই চেনা।  
আমাকে চেনো না?  
আমি তোমাদের ডাক নাম, উজাড় যমুনা।

### ৩০ নিখুঁত স্ট্র্যাটেজী .

পতন দিয়েই আমি পতন ফেরাবো বলে  
মনে পড়ে একদিন জীবনের সবুজ সকালে  
নদীর উলটো জলে সাঁতার দিয়েছিলাম।

পতন দিয়েই আমি পতন ফেরাবো বলে  
একদিন যৌবনের শৈশবেই  
যৌবনকে বাজি ধরে  
জীবনের অসাধারণ স্কেচ ঁকেছিলাম।

শরীরের শিরা ও ধমনী থেকে লোহিত কণিকা দিয়ে আঁকা  
মারাত্মক উজ্জ্বল রঙের সেই স্কেচে  
এখনো আমার দেখো কী নিখুঁত নিটোল স্ট্র্যাটেজী।

অথচ পালটে গেলো কতো কিছু,—রাজনীতি,  
সিংহাসন, সড়কের নাম, কবিতার কারুকাজ,  
কিশোরী হেলেন।

কেবল মানুষ কিছু এখনো মিছিলে, যেন পথেপায়ে—  
নিবিড় বন্ধনে তারা ফুরাবে জীবন।

তবে কি মানুষ আজ আমার মতন  
নদীর উলটো জলে দিয়েছে সাঁতার,  
তবে কি তাদের সব লোহিত কণিকা  
ঁকেছে আমার মতো স্কেচ,  
তবে কি মানুষ চোখে মেখেছে স্বপন  
পতন দিয়েই আজ ফেরাবে পতন।

## ৩১ নিরাশ্রয় পাঁচটি আঙুল .

নিরাশ্রয় পাঁচটি আঙুল তুমি নির্বিশেষ  
 অলংকার করে নাও, এ আঙুল ছলনা জানে না।  
 একবার তোমার নোলক, দুল, হাতে চুড়ি  
 কটিদেশে বিছা করে অলংকৃত হতে দিলে  
 বুঝবে হেলেন, এ আঙুল সহজে বাজে না।

একদিন একটি বেহালা নিজেকে বাজাবে বলে  
 আমার আঙুলে এসে দেখেছিলো  
 তার বিষাদের চেয়ে বিশাল বিস্মৃতি,  
 আমি তাকে চলে যেতে বলিনি তবুও  
 ফিরে গিয়েছিলো সেই বেহালা সলাজে।

অসহায় একটি অঙ্গুরী  
 কনিষ্ঠা আঙুলে এসেই বলেছিলো ঘর,  
 অবশেষে সেও গেছে সভয়ে সলাজে।

ওরা যাক, ওরা তো যাবেই  
 ওদের আর দুঃখ কতোটুকু? ওরা কি মানুষ?

## ৩২ নিষিদ্ধ সম্পাদকীয় .

এখন যৌবন যার মিছিলে যাবার তার শ্রেষ্ঠ সময়  
 এখন যৌবন যার যুদ্ধে যাবার তার শ্রেষ্ঠ সময়  
 মিছিলের সব হাত  
 কণ্ঠ  
 পা এক নয় ।

সেখানে সংসারী থাকে, সংসার বিরাগী থাকে,  
 কেউ আসে রাজপথে সাজাতে সংসার ।  
 কেউ আসে জ্বালিয়ে বা জ্বালাতে সংসার  
 শাস্ত্রত শান্তির যারা তারাও যুদ্ধে আসে  
 অবশ্য আসতে হয় মাঝে মধ্যে  
 অস্তিত্বের প্রগাঢ় আহ্বানে,  
 কেউ আবার যুদ্ধবাজ হয়ে যায় মোহরের প্রিয় প্রলোভনে  
 কোনো কোনো প্রেম আছে প্রেমিককে খুণী হতে হয় ।

যদি কেউ ভালোবেসে খুণী হতে চান  
 তাই হয়ে যান  
 উৎকৃষ্ট সময় কিন্তু আজ বয়ে যায় ।

এখন যৌবন যার মিছিলে যাবার তার শ্রেষ্ঠ সময়  
 এখন যৌবন যার যুদ্ধে যাবার তার শ্রেষ্ঠ সময় ।



### ৩৩ নেত্রকোনা .

কতো দিন তোমাকে দেখি না  
তুমি ভালো আছো? সুখে আছো? বোন নেত্রকোনা।

আমাকে কি চিনতে পেরেছো? আমি  
ছিলাম তোমার এক আদরের নাগরিক নিকটআত্মীয়-  
আমাদের বড়ো বেশি মাখামাখি ছিলো,  
ভারপর কী থেকে কী হলো  
আভাইগা কপাল শুধু বিচ্ছেদের বিষে নীল হলো।

দোহাই লক্ষ্মী মেয়ে কোন দিন জিজ্ঞেস করো না  
আমি কেন এমন হলাম জানতে চেয়ো না  
কী এমন অভিমানে আমাদের এতো ব্যবধান,  
কতোটা বিশৃংখলা নিয়ে আমি ছিমছাম সল্লাসী হলাম।

কিছু কথা অকথিত থেকে যায়  
বেদনার সব কথা মানুষ বলে না, রমনীকাতর-  
সবিতা সেনের সূতী শাড়িও জানে না  
সোনালী অনল আর কতো জল দিদির ভেতর।

কেউ কি তাকিয়ে থাকে নিষ্পলক দাঁড়িয়ে প্রাপ্তগে?  
কারো কি তোলপাড় ওঠে ট্রেনের হুইসেল শুনে মনে?  
তোমার মাটির রসে পরিপুষ্ট বৃক্ষ ফুল।  
মগড়ার ক্ষীণ কলরোল  
অমল কোমল এক মানুষের প্রতীক্ষায় থাক বা না থাক,  
তুমি আছো আমার মজায় আর মগজের কোষে অনুষ্ণ,  
যে রকম ক্যামোফ্লাজ করে খুব ওতোপ্রোতভাবে থাকে  
জীবনের পাশাপাশি অদ্ভুত মরণ।

## ৩৪. পরানের পাখি

পরানের পাখি তুমি একবার সেই কথা কও,  
আমার সূর্যের কথা, কাঙ্ক্ষিত দিনের কথা,  
সুশোভন স্বপ্নের কথাটা বলো,—শুনুক মানুষ।

পরানের পাখি তুমি একবার সেই কথা কও,  
অলক্ষ্যে কবে থেকে কোমল পাহাড়ে বসে  
এতোদিন খুঁটে খুঁটে খেয়েছো আমাকে আর  
কতো কোটি দিয়েছো ঠোকর,  
বিষে বিষে নীল হয়ে গেছি, শুক্রমায়  
এখনো কী ভাবে তবু শুভ্রতা পুষেছি তুমি দেখাও না  
পাখি তুমি তোমাকে দেখাও,—দেখুক মানুষ।

পরানের পাখি তুমি একবার সেই কথা কও,  
সময় পাবে না বেশি চতুর্দিক বড়ো টলোমলো  
পরানের পাখি তুমি শেষবার শেষ কথা বলো,  
আমার ভেতরে থেকে আমার জীবন খেয়ে কতোটুকু  
যোগ্য হয়েছো, ভূভাগ কাঁপিয়ে বেসামাল—  
কবে পাখি দেবেই উড়াল, দাও,—শিখুক মানুষ।

## ৩৫ পৃথক পাহাড় .

আমি আর কতোটুকু পারি ?

কতোটুকু দিলে বলো মনে হবে দিয়েছি তোমায়,  
আপাতত তাই নাও যতোটুকু তোমাকে মানায়।

ওইটুকু নিয়ে তুমি বড় হও,  
বড় হতে হতে কিছু নত হও  
নত হতে হতে হবে পৃথক পাহাড়,  
মাটি ও মানুষ পাবে, পেয়ে যাবে ধ্রুপদী আকাশ।

আমি আর কতোটুকু পারি ?  
এর বেশি পারেনি মানুষ।

## ৩৬ প্রতিমা .

প্রেমের প্রতিমা তুমি, প্রণয়ের তীর্থ আমার।

বেদনার করুণ কৈশোর থেকে তোমাকে সাজাবো বলে  
ভেঙেছি নিজেকে কী যে তুমুল উল্লাসে অবিরাম  
তুমি তার কিছু কি দেখেছো?

একদিন এই পথে নির্লোভ ভ্রমণে  
মৌলিক নির্মাণ চেয়ে কী ব্যাকুল স্থপতি ছিলাম,  
কেন কালিমা না ছুঁয়ে শুধু তোমাকেই ছুঁলাম  
ওসবের কতোটা জেনেছো?

শুনেছি সুখেই বেশ আছো, কিছু ভাঙচুর আর  
তোলপাড় নিয়ে আজ আমিও সচ্ছল, টলমল  
অনেক কষ্টের দামে জীবন গিয়েছে জেনে  
মূলতই ভালোবাসা মিলনে মলিন হয়, বিরহে উজ্জ্বল।

এ আমার মোহ বলো, খেলা বলো  
অবৈধ মুদ্রার মতো অচল আকাঙ্ক্ষা কিংবা  
যা খুশী তা বলো,  
সে আমার সোনালি গৌরব  
নারী, সে আমার অনুপম প্রেম।

তুমি জানো, পাড়াপ্রতিবেশী জানে পাইনি তোমাকে-,  
অথচ রয়েছে তুমি এই কবি সন্নাসীর ভোগে আর ত্যাগে।

## ৩৭ প্রত্যাবর্তন

প্রত্যাবর্তনের পথে

কিছু কিছু 'কস্টলি' অতীত থেকে যায়।  
কেউ ফেরে, কেউ কেউ কখনো ফেরে না।  
কেউ ফিরে এসে কিছু পায়,  
মৌলিক প্রেমিক আর কবি হলে অধিক হারায়।

তবু ফেরে, কেউ তো ফেরেই,  
আর জীবনের পক্ষে দাঁড়ায়,  
ভালোবাসা যাকে খায় এইভাবে সবটুকু খায়।

প্রত্যাবর্তনের প্তহে

পিতার প্রস্থান থেকে,  
থাকে প্রণয়ের প্রাথমিক স্কুল,  
মাতার মলিন স্মৃতি ফোটায় ধ্রুপদী হল,  
যুদ্ধোত্তর মানুষের মূল্যবোধ পালটায় তুমুল,  
নেতা ভুল,  
বাগানে নষ্ট ফুল,  
অকথিত কথার বকুল  
বছর পাঁচেক বেশ এ্যানাটমিক ক্লাশ করে বৃকে।

প্রত্যাবর্তনের পথে

ভেতরে ক্ষরণ থাকে লালনীল প্রতিনিয়তই-,  
তাহকে প্রেসক্লাব-কার্ডরুম, রঙিন জামার শোক,  
থাকে সুখী স্টেডিয়াম,  
উদগ্রীব হয়ে থাকে অভিজাত বিপনী বিতান,  
বাথরুম, নগরীর নিয়ন্ত্রিত আঁধারের বার,  
থাকে অসুস্থ সচ্ছলতা, দীর্ঘ রজনী  
থাকে কোমল কিশোর,  
প্রত্যাবর্তনের পথে দুঃসময়ে এইভাবে  
মূলত বিদ্রোহ করে বেহালার সুর।

তারপর ফেরে, তবু ফেরে, কেউ তো ফেরেই,  
আর জীবনের পক্ষে দাঁড়ায়,  
ভালোবাসা যাকে খায় এইভাবে সবটুকু খায়।

## ৩৮ প্রশ্নান .

এখন তুমি কোথায় আছো কেমন আছো, পত্র দিয়ো।  
এক বিকেলে মেলায় কেনা খামখেয়ালী তাল পাখাটা  
খুব নিশীথে তোমার হাতে কেমন আছে, পত্র দিয়ো।  
ক্যালেন্ডারের কোন পাতাটা আমার মতো খুব ব্যথিত  
ডাগর চোখে তাকিয়ে থাকে তোমার দিকে, পত্র দিয়ো।  
কোন কথাটা অষ্টপ্রহর কেবল বাজে মনের কানে  
কোন স্মৃতিটা উস্কানি দেয় ভাসতে বলে প্রেমের বানে  
পত্র দিয়ো, পত্র দিয়ো।

আর না হলে যন্ত্র করে ভুলেই যেয়ো, আপত্তি নেই।  
গিয়ে থাকলে আমার গেছে, কার কী তাতে?  
আমি না হয় ভালোবেসেই ভুল করেছি ভুল করেছি,  
নষ্ট ফুলের পরাগ মেখে  
পাঁচ দুপুরের নির্জনতা খুন করেছি, কী আসে যায়?

এক জীবনে কতোটা আর নষ্ট হবে,  
এক মানবী কতোটা আর কষ্ট দেবে!

## ৩৯. ফেরীওয়ালা

কষ্ট নেবে কষ্ট  
হরেক রকম কষ্ট আছে  
কষ্ট নেবে কষ্ট !

লাল কষ্ট নীল কষ্ট কাঁচা হলুদ রঙের কষ্ট  
পাথর চাপা সবুজ ঘাসের সাদা কষ্ট,  
আলোর মাঝে কালোর কষ্ট  
'মালটিকালার-' কষ্ট আছে  
কষ্ট নেবে কষ্ট ।

ঘরের কষ্ট পরের কষ্ট পাখি এবং পাতার কষ্ট  
দাড়ির কষ্ট  
চোখের বুকোর নখের কষ্ট,  
একটি মানুষ খুব নীরবে নষ্ট হবার কষ্ট আছে  
কষ্ট নেবে কষ্ট ।

প্রেমের কষ্ট ঘৃণার কষ্ট নদী এবং নারীর কষ্ট  
অনাদর ও অবহেলার তুমুল কষ্ট,  
ভুল রমণী ভালোবাসার  
ভুল নেতাদের জনসভার  
হাইড্রোজনে দুইটি জোকার নষ্ট হবার কষ্ট আছে  
কষ্ট নেবে কষ্ট ।

দিনের কষ্ট রাতের কষ্ট  
পথের এবং পায়ের কষ্ট  
অসাধারণ করুণ চারু কষ্ট ফেরীআলার কষ্ট  
কষ্ট নেবে কষ্ট ।

আর কে দেবে আমি ছাড়া  
আসল শোভন কষ্ট,  
কার পুড়েছে জন্ম থেকে কপাল এমন  
আমার মত ক'জনের আর  
সব হয়েছে নষ্ট,  
আর কে দেবে আমার মতো হুঁপুঁপু কষ্ট।

## ৪০. বাম হাত তোমাকে দিলাম

এই নাও বাম হাত তোমাকে দিলাম।  
একটু আদর করে রেখো, চৈত্রে বোশেখে  
খরা আর ঝড়ের রাত্রিতে মমতায় সেবা ওশুক্রিয়া দিয়ে  
বুকে রেখো, ঢেকে রেখো, দুর্দিনে যন্ত্র নিও  
সুখী হবে তোমার সন্তান।

এই নাও বাম হাত তোমাকে দিলাম।  
ও বড়ো কষ্টের হাত, দেখো দেখো অনাদরে কী রকম  
শীর্ণ হয়েছে, ভুল আদরের ক্ষত সারা গায়ে  
লেপ্টে রয়েছে, পোড়া কপালের হাত  
মাটির মমতা চেয়ে  
সম্পদের সুষম বন্টন চেয়ে  
মানুষের ত্রাণ চেয়ে  
জন্মাবধি কপাল পুড়েছে,  
ওকে আর আহত করো না, কষ্ট দিও না  
ওর সুখে সুখী হবে তোমার সন্তান।

কিছুই পারিনি দিতে, এই নাও বাম হাত তোমাকে দিলাম।



## ৪১ বেদনা বোনের মত .

একদিন আয়নার সামনে দাঁড়িয়ে দেখলাম  
শুধু আমাকেই দেখা যায়,  
আলোর প্রতিফলন প্রতিসরণের নিয়ম না জানা আমি  
সেই থেকে আর কোনদিন আয়না দেখি না।

জননীর জৈবসারে বর্ধিত বৃক্ষের নিচে  
কাঁদতাম যখন দাঁড়িয়ে  
সজল শৈশবে, বড়ো সাধ হতো  
আমিও কবর হয়ে যাই,  
বহুদিন হলো আমি সেরকম কবর দেখি না  
কবরে স্পর্ধিত সেই একই বৃক্ষ আমাকে দেখে না।

কারুকার্যময় চারু ঘরের নমুনা দিয়ে  
একদিন ভরা ছিল আমার দু'রেটিনার সীমিত সীমানা,  
অথচ তেমন কোনো সীমাবদ্ধতাকে আর কখন মানি না।

কী দারুণ বেদনা আমাকে তড়িতাহতের মতো কাঁপালো তুমুল  
ক্ষরণের লাল স্রোত আজন্ম পুরোটা ভেতর উল্টে পাল্টে খেলো,  
নাকি অলক্ষ্যে এভাবেই  
এলোমেলো আমাকে পাল্টালো, নিপুণ নির্ণায়  
বেদনার নাম করে বোন তার শুশ্রুষায়  
যেন আমাকেই সংগোপনে যোগ্য করে গেলো।

## ৪২ ভূমিহীন কৃষকের গান .

দুই ইঞ্চি জায়গা হবে?  
বহুদিন চাষাবাদ করিনা সুখের।

মাত্র ইঞ্চি দুই জমি চাই  
এর বেশী কখনো চাবো না,  
যুক্তিসঙ্গত এই জৈবনিক দাবি খুব বিজ্ঞানসম্মত  
তবু ওটুকু পাবো না  
এমন কী অপরাধ কখন করেছি!

ততোটা উর্বর আর সুমসৃণ না হলেও ক্ষতি নেই  
ক্ষোভ নেই লাভনের পুষ্টিহীনতায়,  
যাবতীয় সার ও সোহাগ দিয়ে  
একনিষ্ঠ পরিচর্যা দিয়ে  
যোগ্য করে নেবো তাকে কর্মিষ্ঠ কৃষকের মত।

একদিন দিন চলে যাবে মৌসুম ফুরাবে,  
জরা আর খরায় পীড়িত থাঁ থাঁ  
অকর্ষিত ওলো জমি  
কেঁদেকেটে কৃষক পাবে না। -

## ৪৩ মানবানল .

আগুন আর কতোটুকু পোড়ে ?  
সীমাবদ্ধ ক্ষয় তার সীমিত বিনাশ,  
মানুষের মতো আর অতো নয় আগুনের সোনালি সন্ত্রাস।

আগুন পোড়ালে তবু কিছু রাখে  
কিছু থাকে,  
হোক না তা শ্যামল রঙ ছাই,  
মানুষে পোড়ালে আর কিছুই রাখে না  
কিছু থাকে না,  
থাঁ থাঁ বিরান, আমার কিছু নাই।

## ৪৪ যাতায়াত .

কেউ জানে না আমার কেন এমন হলো।

কেন আমার দিন কাটে না রাত কাটে না  
রাত কাটে তো ভোর দেখি না  
কেন আমার হাতের মাঝে হাত থাকে না কেউ জানেনা।

নষ্ট রাখীর কষ্ট নিয়ে অতোটা পথ একলা এলাম  
পেছন থেকে কেউ বলেনি করুণ পথিক  
দুপুর রোদে গাছের নিচে একটু বসে জিরিয়ে নিও,  
কেই বলেনি ভালো থেকেই থেকে  
যুগল চোখে জলের ভাষায় আসার সময় কেউ বলেনি  
মাথার কসম আবার এসো

জন্মাবধি ভেতরে এক রঙিন পাখি কেঁদেই গেলো  
শুনলো না কেউ ধ্রুপদী ডাক,  
চৈত্রাশ্বিনে জ্বলে গেলো আমার বুকের গেরস্থালি  
বললো না কেউ তরুন তাপস এই নে চারু শীতল কলস।

লন্ডভন্ড হয়ে গেলাম তবু এলাম।

ক্যাপ্সারু তার শাবক নিয়ে যেমন করে বিপদ পেরোয়  
আমিও ঠিক তেমনি করে সভ্যতা আর শুভ্রতাকে বুক নিয়েই দুঃসময়ে এতোটা পথ একলা  
এলাম শুশ্রূষাহীন।

কেউ ডাকেনি তবু এলাম, বলতে এলাম ভালোবাসি।

## ৪৫ যার যেখানে জায়গা .

ভোলায়া ভালায়া আর কথা দিয়া কতোদিন ঠাগাইবেন মানুষ  
ভাবছেন অহনো তাদের অয় নাই হুঁশ।  
গোছায়া গাছায়া লন বেশি দিন পাইবেন না সময়  
আলামত দেখতাছি মানুষের অইবোই জয়।

কলিমুদ্দিনের পোলা চিডি দিয়া জানাইছে,—‘ভাই  
আইতাছি টাউন দেখতে একসাথে আমরা সবাই,  
নগরের ধাপ্পাবাজ মানুষেরে কইও রেডি অইতে  
বেদম মাইরের মুখে কতোক্ষণ পারবো দাঁড়াইতে।’

টিকেট ঘরের ছাদে বিকালে দাঁড়ায়ে যখন যা খুশি যারা কন  
কোনো দিন খোঁজ লইছেন গ্রামের লোকের সোজা মন  
কী কী চায়, কতোখানি চায়  
কয়দিন খায় আর কয়বেলা না খায়া কাটায়।

রাইত অইলে অমুক ভবনে বেশ আনাগোনা, খুব কানাকানি,  
আমিও গ্রামের পোলা চুত্মারানি গাইল দিতে জানি।

## ৪৬ যুগল জীবনী .

আমি ছেড়ে যেতে চাই, কবিতা ছাড়ে না।  
 বলে,—’কি নাগর  
 এতো সহজেই যদি চলে যাবে  
 তবে কেন ঘর বেঁধেছিলে উদ্ধাস্ত ঘর,  
 কেন করেছিলে চারু বেদনার এতো আয়োজন।  
 শৈশব কৈশোর থেকে যৌবনের কতো প্রয়োজন  
 উপেক্ষার ‘ডাস্টবিনে’ ফেলে  
 মনে আছে সেই কবে—  
 চাদরের মতো করে নির্ধিয় আমাকে জড়ালে,  
 আমি বাল্যবিবাহিতা বালিকার মতো—  
 অস্পষ্ট দু’চোখ তুলে নির্নিমেষে তাকিয়েছিলাম  
 অপরিস্রব তবু সন্মতি সূচক মাথা নাড়িয়েছিলাম  
 অতোশতো না বুঝেই বিশ্বাসের দুই হাত বাড়িয়েছিলাম,  
 ছেলেখেলাচ্ছিলে  
 সেই থেকে অনাদরে, এলোমেলো  
 তোমার কষ্টের সাথে শর্তহীন সখ্য হয়েছিলো,  
 তোমার হয়েছে কাজ, আজ প্রয়োজন আমার ফুরালো’?

আমি ছেড়ে যেতে চাই, কবিতা ছাড়ে না।  
 দুরারোগ্য ক্যান্সারের মতো  
 কবিতা আমার কোষে নিরাপদ আশ্রম গড়েছে  
 সংগোপনে বলেছে,—’হে কবি  
 দেখো চারদিকে মানুষের মারাত্মক দুঃসময়  
 এমন দুর্দিনে আমি পরিপুষ্ট প্রেমিক আর প্রতিবাদী তোমাকেই চাই’।

কষ্টেই আছি—  
 কবিতা সুখেই আছে,—থাক,  
 এতো দিন রাত যদি-গিয়ে থাকে  
 যাক তবে জীবনের আরো কিছু যাক।

## ৪৭ যেভাবে সে এলো .

অসম্ভব ক্ষুধা ও তৃষ্ণা ছিলো,  
সামনে যা পেলো খেলো,  
যেন মন্ত্রন্তরে কেটে যাওয়া রজতজয়ন্তী শেষে  
এসেছে সে, সবকিছু উপাদেয় মুখে।

গাভিন ক্ষেতের সব ঘ্রাণ টেনে নিলো,  
করুণ কার্নিশ ঘঁষে বেড়ে ওঠা লকলকে লতাটিও খেলো,  
দুধাল গাভীটি খেলো  
খেলো সব জলের কলস।

শানে বাধা ঘাট খেলো  
সবুজের বনভূমি খেলো  
উদাস আকাশ খেলো  
কবিতার পান্ডুলিপি খেলো।

দু'পায়া পথের বুক, বিদ্যালয়  
উপাসনালয় আর কারখানার চিমনি খেলো  
মতিঝিলে স্টেটব্যাংক খেলো।

রাখালের অনুপম বাঁশিটিকে খেলো,  
মগড়ার তীরে বসে চাল ধোয়া হাতটিকে খেলো

স্বাধীনতা সব খেলো, মানুষের দুঃখ খেলো না।

## ৪৮ খাল .

আমি কোনো পোষা পাখি নাকি?  
 যেমন শেখাবে বুলি  
 সেভাবেই ঠোঁট নেড়ে যাবো, অথবা প্রত্যহ  
 মনোরঞ্জনের গান ব্যাকুল আগ্রহে গেয়ে  
 অনুগত ভঙ্গিমায় অনুকূলে খেলাবো আকাশ,  
 আমি কোনো সে রকম পোষা পাখি নাকি?

আমার তেমন কিছু বাণিজ্যিক ঋণ নেই,  
 কিংবা সত্তানে এ বাগানে নির্মোহ ভ্রমণে  
 কোনোদিন ভণিতা করিনি। নির্লোভ প্রার্থনা  
 শর্ত সাপেক্ষে কারো পক্ষপাত কখনো চাবো না।

তিনি, শুধু তিনি  
 নাড়ীর আত্মীয় এক সংগঠিত আর অসহায় কৃষক আছেন  
 ভেতরে থাকেন, যখন যেভাবে তিনি আমাকে বলেন  
 হয়ে যাই শর্তহীন তেমন রাখাল বিনা বাক্য ব্যয়ে।

কাঙাল কৃষক তিনি, জীবনে প্রথম তাকে যখন বুঝেছি  
 স্বেচ্ছায় বিবেক আমি তার কাছে শর্তহীন বন্ধক রেখেছি।



## ৪৯ রাডার .

একটা কিছু করুন।

এভাবে আর কদিন চলে দিন ফুরালে হাসবে লোকে  
দুঃসময়ে আপনি কিছু বলুন  
একটা কিছু করুন।

চতুর্দিকে ভালোবাসার দারুণ আকাল  
খেলছে সবাই বেসুরবেতাল-  
কালোমর্মাত্তিক নষ্ট খেলা-কঠিন-,  
আত্মঘাতী অবহেলো নগর ও গ্রাম গেরস্থালি  
বনভূমি পাথপাখালি সব পোড়াবে,  
সময় বড়ো দ্রুত যাচ্ছে  
ভাল্লাগে না ভাবটা ছেড়ে সত্যি এবার উঠুন  
একটা কিছু করুন।

দিন থাকে না দিন তো যাবেই  
প্রেমিক যারা পথ তো পারেই  
একটা কিছু সন্নিহিতে, আত বাড়িয়ে ধরুন  
দোহাই লাগে একটা কিছু করুন।

## ৫০ লাভণ্যের লতা .

দূরভিসন্ধির খেলা শেষ হয়ে কোনোদিন  
দিন যদি আসে,  
এই দেশে ভালোবেসে বলবে মানুষ,  
অনন্ত অসন্তোষ অজারকতার কালে এসে  
লাভণ্যের লকলকে লতা এক খুব কায়ক্লেশে  
একদিন তুলেছিলো বিনয়াবনত মাথা  
এতোটুকু ছিলো না দীনতা।

অকুলীন এই দিন শেষ হয়ে কোনোদিন  
দিন যদি আসে,  
শুভ্রতায় স্নিগ্ধতায় সমুজ্জল মানুষ এদেশে  
বলবে সূর্যের দিকে ছিলো সেই লতাটির মুখ  
বলবে মাটির সাথে ছিলো তার গাঢ় যোগাযোগ,  
কিছু অস্বিজেন সেও দিয়েছিলো  
নিয়েছিলো বিষ  
বলবে পুষ্পিত কিছু করেছিলো ধূসর কার্নিশ।

ভালোবাসাবাসিহীন এই দিন সব নয়-শেষ নয়  
আরো দিন আছে,  
ততো বেশি দূরে নয়  
বারান্দার মতো ঠিক দরোজার কাছে।

## ৫১ শামুক .

‘অদুত, অদুত’ বলে  
সমস্বরে চিৎকার করে উঠলেন কিছু লোক।  
আমি নগরের জ্যেষ্ঠ শামুক  
একবার একটু নড়েই নতুন ভঙ্গিতে ঠিক গুটিয়ে গেলাম,  
জলে দ্রাঘিমা জুড়ে  
যে রকম গুটানো ছিলাম,  
ছিমছাম একা একা ভেতরে ছিলাম,  
মানুষের কাছে এসে  
নতুন মুদ্রায় আমি নির্জন হলাম,  
একাই ছিলাম আমি পুনরায় একলা হলাম।

## ৫২ সম্প্রদান .

ভাদ্রের বর্ধিত আশাড়ে সখ্য হয়েছিলো।  
সে প্রথম, সে আমার শেষ।

পথে ও প্রান্তরে, ঘরে,  
দিতে রাতে, মাসে ও বছরে  
সমস্ত সাম্রাজ্য জুড়ে  
সে আশাড় অতোটা ভেজাবে আমি ভাবিনি কসম।

আমার সকল শ্রমে, মেধা ও মননে  
নিদারুণ নম্র খননে  
কী নিপুণ ক্ষত দেখো বানিয়েছে চতুর আশাড়।

একদিন  
সব কিছু  
ছিলো তোর  
ডাক নামে,  
পোড়ামুখী  
তবু তোর  
ভরলো না মন,—  
এই নে হারামজাদী একটা জীবন।

## ৫৩ হিজলতলীর সুখ .

বলাই বাহুল্য আমি রাজনীতিবিদ নই, সুবক্তাও নই  
তবু আজ এই সমাবেশে বলবো কয়েক কথা  
সকলের অনুমতি পেলে।

—‘বলুন, বলুন’।

রঙিন বেলুন দিয়ে মন ভোলানোর কোনো ইচ্ছে আমার নেই,  
উপস্থিত সুধী, কেউ ভুলে মনেও করবেন না আমি  
পারমিট, পেঁয়াজ আর পারফিউম ন্যায্যমূল্যে দেবো।

—‘পেঁয়াজটা পেলে ভালো হত’।

আর কতো? যারা দিতো তারা আর দেবে না বলেছে।

—‘কী হবে? কী হবে এখন উপায়’?

হেলায় খেলায় হয়েছে অনেক বেলা ফুরিয়েছে দিন  
অবহেলা প্রপীড়িত মানুষেরা শোধ চায় ঋণ,  
তবু দেবে, ভাত দেবে—ভোট দেবে, তবে  
সামান্য তকলিফ করে মাঝে মধ্যে গ্রামে যেতে হবে।

—‘তবে কি সত্যি সব যা কিছু রটেছে’?

ঘটনা ঘটেছে এক মারাত্মক স্বাধীনতাউত্তর এদেশে—  
প্রাপক দিয়েছে জেনে কারা ভদ্রবেশে  
হিজলতলীর সুখ জবরদখল করে রেখেছে এদিন—,  
একটা কিছু তো আজ যথাথই খুব সমীচীন।

## ৫৪ হিরণবালা .

হিরণবালা তোমার কাছে দারুন ঋণী সারা জীবন  
যেমন ঋণী আব্বা এবং মায়ের কাছে।

ফুলের কাছে মৌমাছির  
বায়ুর কাছে নদীর বুকে জলের খেলা যেমন ঋণী  
খোদার কসম হিরণবালা  
তোমার কাছে আমিও ঠিক তেমনি ঋণী।

তোমার বুকে বুক রেখেছি বলেই আমি পবিত্র আজ  
তোমার জলে স্নান করেছি বলেই আমি বিশুদ্ধ আজ  
যৌবনে এই তৃষ্ণা কাতর লকলকে জিভ  
এক নিশীথে কুসুম গরম তোমার মুখে  
কিছু সময় ছিলো বলেই সত্য হলো  
মোহান্ন মন এবং জীবন মুক্তি পেলো।

আঙুল দিয়ে তোমার আঙুল ছুঁয়েছিলাম বলেই আমার  
আঙুলে আজ সুর এসেছে,  
নারীখেলার অভিজ্ঞতার প্রথম এবং পবিত্র ঋণ-  
তোমাকে নিয়ে কবিতা লিখে সত্যি কি আর শোধ হয়েছে?

**৫৫ হৃদয়ের ঋণ .**

আমার জীবন ভালোবাসাহীন গেলে  
কলঙ্ক হবে কলঙ্ক হবে তোর,  
খুব সামান্য হৃদয়ের ঋণ পেলে  
বেদনাকে নিয়ে সচ্ছলতার ঘর

বাঁধবো নিমেষে। শর্তবিহীন হাত  
গচ্ছিত রেখে লাজুক দু'হাতে আমি  
কাটাবো উজাড় যুগলবন্দী হাত  
অযুত স্বপ্নে। শুনেছি জীবন দামী,

একবার আসে, তাকে ভালোবেসে যদি  
অমার্জনীয় অপরাধ হয় হোক,  
ইতিহাস দেবে অমরতা নিরবধি  
আয় মেয়ে গড়ি চারু আনন্দলোক।

দেখবো দেখাবো পরস্পরকে খুলে  
যতো সুখ আর দুঃখের সব দাগ,  
আয় না পাশানী একবার পথ ভুলে  
পরীক্ষা হোক কার কতো অনুরাগ।

## ৫৬ ব্যবধান .

অতো বেশ নিকটে এসো না, তুমি পুড়ে যাবে,  
 কিছুটা আড়াল কিছু ব্যবধান থাকা খুব ভালো।  
 বিদ্যুত সুপারিবাহী দু'টি তার  
 বিজ্ঞানসন্মত ভাবে যতোটুকু দূরে থাকে  
 তুমি ঠিক ততোখানি নিরাপদ কাছাকাছি থেকো,  
 সমূহ বিপদ হবে এর বেশী নিকটে এসো না।

মানুষ গিয়েছে ভুলে কী কী তার মৌল উপাদান।  
 তাদের ভেতরে আজ বৃক্ষের মতন সেই সহনশীলতা নেই,  
 ধ্রুপদী স্নিগ্ধতা নেই, নদীর মৌনতা নিয়ে মুগ্ধ মানুষ  
 কল্যাণের দিকে আর প্রবাহিত হয় না এখন।

আজকাল অধঃপতনের দিকে সুপারসনিক গতি মানুষের  
 সঙ্গত সীমানা ছেড়ে অদ্ভুত নগরে যেন হিজরতের প্রতিযোগিতা।

তবু তুমি কাছে যেতে চাও? কার কাছে যাবে?  
 পশুপাখিদের কিছু নিতে তুমুল উল্লাসে যেন-  
 বসবাস করে আজ কুলীন মানুষ।



‘বইটি পড়ার জন্য ধন্যবাদ’